

路乎答曰上下之情不阻隔然後君臣如魚水之得是以言之○歲饑生員辛百齡上疏曰民者國之本也食者民之天也古之王者必使赤子免於飢寒者豈歲恒豐足而然也以蓄積足而備先具也今國無常儲而植此無前之災民生嗷嗷如嬰兒之絕乳其死可立而待聖上雖有愛閔之心無蓄積可以救荒無隣國可以告糴將何以濟吾民乎蓋遭非常之變不可無權以處之納粟拜官雖漢唐之弊政今若暫用之亦可用救活吾民上可之○擢李彥迪爲右參贊先是吏曹擬彥迪於金海府使上曰此人宜在朝廷不可補外至是超拜○冬十月詣文廟謁聖試士○大憲宋麟壽等上劄曰國家於朝講既令臺諫入閣猶以爲未也又引特進官輪侍講論其意甚美近者大臣言特進侍講爲無益而欲廢之上詢親賢之道而下進疎賢之策引君當道固如是乎大諫李潔等上劄曰近者政事之際得蒙御批者多出於請托宮闈以謂苞苴內囑是爲求仕之捷徑皆由聖上刑家之道有所未盡也答曰此予不慎之致當更加深省嚴勅也其後侍講官韓澍曰近聞王子駙馬交結市人多行不義上雖不知有關刑家之政上曰此事吾未及知若知之則豈不禁之○十一月王世子上

疏曰伏以天顯之親一氣而分喘息呼吸相爲流通友愛之情自不容已雖或有非常之變出於慮外古之人猶有以恩掩之者往者媚之事臣年幼未能詳知其首末然其禍之慘實不忍言妖孽之作雖曰朴氏媚也焉能以知之竄在遐裔亦云過矣而厥後又興大獄母子相踵而死洪礪亦殞杖下變故之極古所罕聞兄弟之情顧當如何哉死者已矣媚之一女棄在民間與庶人無異孩提之女亦何罪焉此又痛心者也二翁主年少女子不與其事明矣而屬籍亦絕思之至此不覺涕零由臣一身兄弟之變至於如此此臣平日恒懷痛悼者也孟軻有言身爲天子弟爲匹夫可乎今臣侍居東宮天寵極矣而使二姊一姪尙班下賤反躬思之顏厚有忸怩仁人之於兄弟不藏怒焉不宿怨焉親愛之而已如臣者有何怨怒於兄弟而不相親愛乎籩豆之饋飲食之餽亦不得和樂且湛則惻然之念益切于中前此微達是意未蒙允俞更瀝微衷以瀆聖聽伏願垂憐焉上感而從之命復福城君及光川尉翁主官爵立其後外人初不知有疏久而後出○以權機爲左參贊機好讀書老而不怠經幄之間每進嘉言雷霆之下猶不顧身國有大事坐而待朝然短於謀事暗於知人徑情直

行未免有疎戇謬妄之病○時都下強盜恣行捕盜大將黃琛若罔聞知及都下喧闐乃奏以一牌軍士不能捕獲請以內禁衛兼司僕閑良有武才人定捕盜部將從之○十二月憲府奏及第出身乃士子入仕之初程當謹其禮際養其氣節以待用可也今也不然號爲新來肆行侵虐泥塗沒身糞穢滿面責設宴會飲食如流少不如意詬辱交加爲新來者晝夜丐乞請貸奔走應給知紓目前之困不顧廉耻之防或依贅於富商之家以資其費失身墜名莫此爲甚上下教痛禁且令掛榜使中外人皆知之○寧越自魯山慘禍後郡守多暴死世謂凶地朴忠元爲郡守爲文祭其墓曰王室之胄幼冲之辟適丁否運遜于外邑一片青山萬古孤魂庶幾降臨式歆苾芬四時行祀仍用此文自是郡竟無事

壬寅三十七年春正月副學李浚慶等上劄曰太學乃首善之地風化所源而爲國子者不知學問急於干進一聞公薦之令空集黌舍規與薦列有同市門論薦之際不擇恬退之士只錄居右席者函丈之間若聞義理之說視如蜀犬之雪弊至此極豈不寒心且宗姓之親同出先王雖其所爲或有狂悖如非逆

亂當行推恩之典而高靈監等失祿居窮不能自存遂陷身於不義觀其所犯固無可恕然矜恤之意當異凡人况其所供有足以議其罪乃屢加訊鞫於執迷之人如或殞命於箠楚之下其於親親之仁豈無所傷竊恐角弓之怨起於今日也○分遣侍從臣爲諸道救荒從事官使知自上救民之意○二月同知中樞府事崔世珍卒世珍系出卑微而少能力學尤精漢語既登第交隣吏文皆自主之由是得蒙薦擢官至二品所著諺解孝經訓蒙字會吏文輯覽行于世○江哲年十三其兄得惡疾哲斷指燒饋以離其病上聞之命旌門復戶○分遣御史任說于全羅李滉于忠清金儲于慶尙閔筌于京畿廉察賑政○工曹參議柳希軫進所選大東詩林大東聯珠詩上賜酒及馬○以黃懿爲桂坊侍直懿吏參憲之弟也吏兵曹堂上各以其私相薦擬之已成弊風時人謂之換手○日本國王遣使來其書曰癸未年朕之臣有自大明還遇風漂流于貴國者若干貴國指爲奸賊誅戮之束縛之獻于大明而不還于弊邦嗚呼君子亦黨乎琉球漂氓之在貴國者皆賞賚撫育或由大明或託弊邦還之夫琉球與日本相去不知其幾萬里而况於貴國乎以萬里作肝膽以隣國作楚越違

例負約是何故也我國有山其名曰金山近產真銀故往歲獻于大明大明嘉悅今又聘于貴國具在別幅大明漂氓八十餘名被風來到我國豐州浦今欲附于使船假道於貴國以還之而彼皆掉頭曰若還我於朝鮮必顛沛於溝壑願從琉球還故竟從其意還之於是朝廷辨答之大臣等奏日本使所賣商物中銀兩多至八萬若盡許公貿則其直不貲令戶曹斟酌定其公貿其餘許令私貿民間何如諫院奏銀雖可寶民不可以衣食之民以有用之綿布換無用之銀利歸於彼而民受其弊甚不可況此私貿前者所無今若開端彼樂其利而後必倍其賣國家將何以應其無厭絕之於始則其怒猶淺既許而旋止其怒益深且許民私貿有違禁銀之令而大臣苟循上意但曰酌處而已此甚不可憲府弘文館繼論之上可之而終不能用○忠州牧使安璋善山府使魚永津固城縣令崔渙泗川縣監裴繡光豐基郡守周世鵬安東府使金光轍救荒之政爲守令第一命加資○閏五月對馬島主書契來禮曹荅之曰來書無感戴寵賜之意多不遜不滿之語禮失敬順事犯悖上良用駭訝貴島自先世效款輸忠於我國無有少懈我國亦撫恤特至如慈母之愛赤子賜賚寵獎之恩

彌久彌厚而貴島乃背大恩忘大德敢謀叛亂罪不容於覆載固當永絕不與相通特緣日本國王專使來請勤懇不已故不忍固拒僇勉副之然悖逆之人縱許容貸恩接之典自難如舊裁損斟酌立爲條約固當永世遵守不可變改貴島苟思前日所爲之如何我國寬容者如何則自當感幸踴躍之不暇敢復有濫分之望哉况庚午叛亂專由於三浦居倭之故貴島固不得并與他事而出諸口筆諸書也去歲捕送罪倭益見足下效忠之實國家嘉之略有恩賞物雖不腆未爲不寓獎寵之意凡在下之道承恩於上物雖微細榮則重矣固當知感貴島受寵賜不爲不優而非徒不以爲感乃反傲慢不遜此何意也貴島雖僻處海中不習詩書禮義島中賢智亦應有之豈不知禮義所在而乃至於此乎且凡事上之道已雖無罪上以爲非則當引咎自責深懷恐懼已雖有功上有所獎則亦當退遜不自爲功今足下捕送賊倭固爲可嘉國家既已知之而加獎典矣足下何必自誇其功乎蓋往歲罪倭等皆其自犯固不干足下而島中之人厥數有限足下苟能檢攝於平日加戒勅於管下凡有罪犯一一嚴治則奸濫之徒害人作弊何至若是之縱恣乎且貴島先世恪事我國之時倘

有可獎在先朝或遣官然是特異數之恩禮視島主忠否而行之去庚午之歲朝廷亦遣使于貴島到浦將發而適有叛亂之事中途而還此直因貴島之不順非我國無端廢之也足下苟積忠敬之實以著孚誠則先朝舊禮豈無復行之日乎惟在足下勉蹈先世之忠耳○秋七月朔日食○同知中樞府事李賢輔不喜榮進爲親乞養補外莅歷八郡皆有聲績及還朝屢轉爲參判至是辭歸人或挽之拂袖登舟舟中惟有花甌數坐奕碁一局而已○判中樞府事梁淵卒淵氣度毅然長於料事明於吏治其將兵柄能辦機務然廉謹不足賄賂盈門○八月善山府使魚永津上疏曰臣前爲僉使見水軍之役莫苦於造船所謂三猛見樣之船大而無用且易朽敗而軍卒雖當下番未得歸農長時供役至其不堪而逃散則以族充之無族者以隣充之隣不能支皆盡流亡其弊之甚至於如此今若罷見樣之船而用兵船則可以寬軍人之力而邊禦亦無虛疎之虞矣臣又嘗爲江界府使見軍馬驛馬亦皆多弊凡官用柴炭屯田除草專用民力是以民不能支流亡日多城內空虛又無長江之限故賊人乘虛潛入窺見虛實是固可慮也臣以爲當以江界府使兼節度使理山以上隸江

界碧潼以下隸寧邊首尾相救則不惟備邊得策驛郵困弊亦可除矣○敕曰宋太宗欲求遺書詔中外有以書上者視卷帙多寡而酬賞其不願上者借寫而還其本由是四方之書爭出矣今亦令官所藏書籍外募納優賞則致書可多矣○九月清州人於田中掘陶瓮內有銀尊四坐觀察使宋璩進之上曰祖宗朝或以玉盃及他酒器賜弘文館讀書堂其以此造酒器分賜承政院弘文館讀書堂侍講院○上與世子召宗親儀賓或試講書或製述或投壺講製優等者各加一資其餘賞賜○權有禮朴楨等年皆百歲上引見賜米豆加資○冬十月時撻子侵中國且近我西鄙上與大臣議設備擇儒將知邊事者以李芑爲平安巡邊使使之措處器械軍卒方畧

癸卯三十八年春正月朔日食○判中樞府事金安國卒安國早喪父母遂自號以慕齋出入必告朔望必祭受業于金宏弼慨然有求道之志博通書史至於天文地理無不涉獵自登仕夙夜勤勞盡心王事己卯後退居利川以興起斯文爲己任及安老敗還朝大爲善類所依歸○夜東宮火外鎖寢門世子僅得免禍人皆疑尹元衡等所爲正言沈荅言於同僚曰東宮衝火公論大發爲

言官者何可容默今當論奏以正謀害東宮之罪大諫李霖等上劄曰褻昵之漸易至騰凌忌克之禍終成厲階持平鄭希登倡言於朝曰今朝著不靖因成子澤交構兩尹馴成離隙此非私鬪實關國家必先劾交亂之罪然後兩尹所爭分公私糾劾可也兩尹深憚之○二月御經筵大諫具壽聃曰邪議飛騰指尹任爲大尹尹元衡爲小尹而各樹黨與云若小人乘間逞術則人心竦動恐成後日之患自上若預知則自不動搖矣執義李夢亮曰但此邪議無形治之固難自上深省其機鎮定爲當上曰是必小人乘間欲亂朝廷也推問其始造邪議者然後可鎮定也壽聃曰邪議之人如鬼如蜮不可知其爲某人夢亮曰無形之言推之似難領事洪彥弼曰自上能鎮定而不撓則雖不推問而當自止矣上曰前日諫院劄有褻昵忌克之語不知何所指也夢亮曰難解之言雖問之亦可壽聃曰臣問于諫院則曰無他意云彥弼曰如臣者亦以不能文之故有時無情而書亦有如此者上因言東宮失火曰自火之初起來告者皆云出於水賜婢供禁中水房予率小宦親往見之果然其火初不自外出也後又詳聞於宦豎則一房之內四人并置雜物而出入其中一婢置木棉不覺燈燼

之誤落門則鎖而火熒焉及其大熾婢罔知所措持鑰匙狂走不知所以開之門不得趁開故火不得趁滅至於大熾火之自房起者甚分明不可以一婢之故輒起刑獄於內人也當時亦議于大臣而言甚細瑣故未盡言之今乃言之者宮禁之事當使外人洞知故耳筵罷上欲召前大諫李霖問劄中所言壽聃等奏疏劄所言當時於經筵偶然下問則可矣追問其由於既遞之員則恐有後弊上曰前大諫已爲外官早晚當問於經筵○以成世昌爲大提學○三月移御于昌德宮王世子從焉以東宮火也○夏六月副修撰金麟厚等上劄曰已卯之禍朝野莫不愍其冤枉而至今不能開陳本心顯白非奉上以釋聖上一念之疑下以洒諸臣九原之冤一有端言正色之人則論者輒斥以小學之徒紀綱之陵夷風俗之頹敗職此之由也○大憲崔輔漢大諫具壽聃奏刑曹判書蘇世讓往者與兩司長官成世昌柳仁淑因旱災論疏放而如丁酉被罪之人許洽之類亦以爲可放陰勸成之旋又囑侍從反擊臺官又於己亥求言之時李若水上疏而挾其私嫌潛囑臺諫請下獄鞫問如此陰中之事非止一二請罷職從之○副提學柳辰全等上疏曰己卯新進之士以迂闊狂狷之質

有好古尚志之心而又信聖上好善之誠以爲三代至治可指日而待倡小學之教不能無躁擾急迫之弊及夫妻妻一織網打士林遂并與其書而詆毀之如宋朝僞學之禁嗚呼將雖覆軍兵書其可廢也醫雖殺人古方豈不用乎上曰小學教人之本豈可以己卯諸人而廢之近來人心士習大不如前可勝憂歎此疏之言大關治體予當留念焉○秋七月檢討官金麟厚奏曰近來無狀小人指沈貞死有餘罪者皆得復職雖有一時行事之或誤而若其本心則實不欺國者指趙尹自任韓忠等尙不蒙恩其所尙之書指小學鄉約并棄而不用竊以爲不可筵罷上問承旨洪暹曰金麟厚所奏顛末不得詳聽果指何人暹曰臣亦不及詳聞問于史臣則云本心不欺國指己卯諸人趙光祖等也後二日麟厚更奏曰己卯人其一時所爲雖不能盡是然其本心則無一毫欺國而終蒙重罪其後被罪之人雖死有餘罪者日月已久或有復職而已卯之人尙不蒙上恩臣獨以爲不可非特此也其一時所尙小學鄉約之書并棄而不用小學鄉約紫陽朱子藍田呂氏之書也朱呂皆聖賢之人豈其書不善而今之儒者溺於俗尙以爲不可讀之書而棄之尤爲不可不知者則己卯之人全

以不軌論之故當今之時如此之言人皆以爲觸犯而諱之然臣之所見如此敢以奏達上曰彼輩之設心雖云不非將誤國事故朝廷欲矯其弊而罪之然小學鄉約則不可以人而廢之也特進官李彥迪曰聖上即位之初專務學問敦尙四維自經士林之禍人皆諱言教化而士習不正今當上法祖宗以明教化厚人倫則下之人自然觀感變化而日趨於善矣上教曰近來物論及疏章皆以小學鄉約爲言己卯之爲小學鄉約者徒尙其文而不務其實其弊至於以下居上以賤凌貴故欲矯其弊而不用非以小學之書爲非而棄之也常時殿講時其并講之史臣曰上之問于洪暹者非真不知其何人蓋欲察下情耳暹當隨問辨明而直奏之可也乃曰臣亦未及詳聞模糊自保之計巧矣非徒不敢直奏又問于史官而奏則是使回奏之言不欲出於己而諉之於他人也○特加宋欽崇政階除判中樞府事以有清德也欽初爲南原訓導柳子光每稱其才欲推薦欽耻爲其與漸自疎外子光見欽曰何不來見欽曰高門煩擾下官不能接跡子光不悅○先是慶尙御史金儲復命曰南海縣賑濟幕高敞監彭年亦率一女與奴就食彼雖妄悖被罪以宗派之人窮餓寄食於賑濟之

幕有欠聖上親親之道上曰宗室之人非有大罪而使之至此不合事體八月特進官權撥曰禾穀不熟民多震死怨氣所積豈無變異高敞監之圍籬安置今三十年彼雖爲無道自上亦加留念上命大臣議尹殷輔等言今觀彭年罪案性本頑悍恣行不義至犯死罪特命減死絕島圍籬災異之出恐不由此乃止○冬十月以李若水爲忠州牧使○十一月親講儒生命入侍宰相論難○政院言欽敬閣中四節雜象及稼穡艱難備在其中請以孔子欵器銘并書入以備觀戒從之○以贊成柳灌爲平安觀察使時北虜入寇于明明朝有請兵我國之議上以西方爲虞出灌爲觀察時朝廷有大小尹之說廷議以爲灌不可出外上曰欲弛西虞故出重臣以鎮之非有他意特加灌崇祿而遣之○十二月以金麟厚爲玉果縣監麟厚見大小尹相軋知朝廷有大禍以親老乞養許之縣民有以田畔一柿木相訟者麟厚令甲枝結子甲主之乙枝結子乙主之中枝結子則任之無主兩人感之相讓名曰河西也厚柿○戶曹上今年戶口之數戶八十三萬六千六百六十九口四百十六萬二千二十一
甲辰三十九年春正月侍講院文學李畬卒畬篤學力行母病癩晝夜侍側衣

不解帶屏去妻孥親自扶護居常多病計其不仕進之日多則例不受祿嘗以爲儲副國之本根不可不及時進學力疾進講分析援譬期於進德金安國嘗曰吾與畬侍筵中雖無言而退安寢矣其見推重如此○二月諫院以赴明使尹元衡金萬鈞等不能糾檢使下人多賣銀兩猥濫貿易奏黜之○時駙馬皆不得畜妾有犯者子母或至杖殞淳原尉趙義貞年少狂悖昵愛婢妾屢被譴責略不忌憚翁主女上之貞順不妬善護之得保焉及翁主以產證暴卒即係義貞禁府并囚其妾推問致死之由事將不測賴臺諫侍從有救之者止流遠方○南原府使吳謙南平縣監白仁傑皆有善政命加一資○三月副提學宋世珩奏已卯諸人過激誤事爾非其本心也趙光祖亦憂時輩過激類多裁抑而反爲其所短以此言之光祖其最賢者也觀其臨死詩亦可知其所守而他人幾皆復官獨光祖尙未焉士林痛惜今若特加恩命明示好惡則士習自美矣上首肯曰光祖事前已屢聞之果或如是矣但當時以光祖爲罪首今不可輕議其後侍讀官李英賢曰趙光祖至今未得伸雪物情甚冤特進官任權曰臣與光祖同居學宮知其心本不如此而受罪酷於他人他人皆復而光祖未復

士論悶鬱上曰光祖排斥老成變亂朝廷故事至於此朝廷豈偶然計之而處之如此乎獻納李首慶檢討官李樞申奏不從世珩等又上疏累千言言甚剴切答曰趙光祖事予皆知首尾初雖有可取之事後則排斥舊臣變亂舊章科舉大公也而自相薦引名曰薦舉還給職牒似不可輕議正言金鎧奏於經筵曰光祖等原其本心只爲君與國耳非有邪心也此豈不已洞然於聖鑑之中而但不曾明示好惡故士習不正士氣摧抑上不答領事尹仁鏡曰本心不然而罪之已久今難改之上教當矣司諫慶渾等大憲李滢等亦皆上劄答曰他人可叙光祖則不可○曹閔孫居晉州服繼母喪時金正國爲觀察使閔孫邀致其家宰牛設宴閔孫着喪服出待之啖肉如常正國業已往矣不得徑出但不下箸而還以此被論不齒朝列有言舊將不可終棄者遂叙拜上護軍○以丁熿爲禮曹正郎熿既喪其親事兄及嫂如父母及兄亡心喪三年喪畢奉嫂入京凡祿俸盡入嫂室以聽其裁節嫂認爲己物不肯多與計活甚窘而終無難意○夏四月禮判任權奏文廟從祀諸賢名號謬誤頗多請令弘文館博考諸書參其異同改其位版且楊時程門高弟傳道於朱熹而不參享於我國士

論以爲未穩尹殷輔等議諸儒姓氏考諸五禮儀註有不同大明國子監所錄從享諸儒姓氏亦有不同不能歸一不可輕易釐正請令該曹博探古制兼採中朝禮文然後更議施行從之○時對馬島倭數寇于邊且其書契多不恭語上命議拒絕與否尹殷輔等以爲義當拒絕洪彥弼等以爲不可輕絕尙震曰對馬島土地瘠薄加土石上耕麥而食若不通我國無所資生勢必爲窮寇不可輕絕也從之○厚陵參奉丁應虛培克日甚守護軍不堪其苦放火于丁字閣延燒陵所階砌○五月有政時求官者奔競成風賄賂公行臧獲田地爭輸權門一官闕窠三公六卿請簡雲集參望者不惟納賄於宰相又納賄於椒掖姬嬪之家故一參其望卽拜其職○松都人徐敬德自少力學結草廬於花潭之側日與學徒講論其學以深思自得爲務家貧餽粥不繼府官或有贈與多不受居喪啜粥三年留守宋璵欲以孝行奏旌敬德詣府庭辭止至是以薦授厚陵參奉亦不就曰吾已老矣何事於是平居常有蕭散冲夷之樂爲詩亦有康節之風○上以厚陵有火災欲親祭慰安三公議親祭厚陵古無其例常時只祭寒食今不必親祭待丁字閣畢造遣官祭之可也從之○旱避殿減膳求

言麻田郡守朴世茂上疏曰宮闈不嚴干請興行媒進之類囚係之徒因緣出入終遂已欲者滔滔皆是夫賣官鬻獄漢唐中主所不爲而聖上爲之乎前日聖上嘗戒東宮曰勿聽婦言今豈甘自處於暗昧之地而爲害政之事乎臣待罪畿甸于今六年備知民情矣賦役之煩科歛之重進供之艱有不可勝言者民情甚苦此亦足以召災末言趙光祖伸雪事上例荅世茂在郡愛民甚至又是疏聞者躉之嘗著童蒙先習一卷刊行于世○生員辛百齡等上疏請伸趙光祖冤累日伏閣竟未蒙允時上惑猶未解而大臣亦多有不悅者○守門正兵李元弼上疏陳民弊二十五事朝廷不採用○戶曹參議李名珪奉使如明歸獻元學士趙孟頫所畫幽風七月圖上特賜法醞○秋七月臺諫奏內人銀代罪惡雖教以非關宗社而內人擅行殺戮將來之漸豈不有關於宗社乎答曰予若不從臺言豈命黜送門外乎臺諫至於辭職大臣又請遠竄上勉從之○領議政尹殷輔卒殷輔慈詳恭儉心無伎害長於吏才頗有聲績位至一品而益自儉慎自奉如布衣時然素無學術器局凡下隨時浮沉故沈貞金安老亦不怨焉及安老死獨居相位嘗卜相以蘇世讓沈彥慶權輒奏薦士林非

之○雷震景福宮東水閣上責躬大赦○八月領中樞柳溥卒溥昏惑執拗以文墨發顯貞顯之喪爲守陵官無誠敬之實而得高官金安老擅政以其人無足忌憚不排去之故得陞崇品入相公論卽發立朝四十餘載徒尸厥位時人謂之伴食宰相○以成世昌爲右贊成世昌坦率不廉謹居家姬妾臧獲爭捧請簡多受賄賂物論鄙之○右參贊黃憲附尹元老輩曾爲吏判擬薦之際託稱中殿之教恣行其私略無忌憚擬尹元弼元老於饒司曰外戚之人當飽其慾以是被玉堂之駁欲陷害玉堂之人乃曰應教丁應斗修撰閱起文預告我以上劄之意玉堂請治二人漏洩僚議之罪知其誣而止其傾險類此至是憲府請遞之憲又颺言於人曰我有何罪只以不取己卯之事故也士林鄙且患之○判中樞宋欽上疏曰爲國之道其大要不過曰內修外攘而已內修之道朝廷固已行之若外攘之策或有未盡修舉今聞邊將屢見挫於唐船彼稱唐船者雖曰漂流失路而要皆有心於寇劫者也不然則何以多備大砲而動輒傷人無乞憐之意而有恐動之言乎且聞其船堅緻異常四面皆板屋又其中寬闊可容百餘人其他器械無不精利故所向無敵我國則沿邊要害之地別

無戰艦之備公私船隻率皆狹隘四面皆虛無有蔽障且火砲年久藥力無效視彼唐人之砲真兒戲耳其他器械皆亦殘弊其遇賊必敗勢之使然也古人云器械嚴整則士氣精明器械之中戰艦尤重爲今之計沿海列邑分定戰艦之數使之督造必須用板爲障一如唐船之制戰艦已備則軍卒有所恃又多備火砲弓箭槍鋸歲鍛而月鍊之則雖遇賊船吾何畏彼哉雖然得人爲上器械次之請自今兵水使守令萬戶等官必擇其有才德堪爲軍帥者任之則恩威并行士卒用命無不一當百矣擇人之方使大臣及諸大夫各舉所知所舉得人則賞之否則罰之著爲法令行此之令信如四時則必無謬舉之弊矣雖然擇將爲上選卒又次之欲選其卒爲將者當以身之壯弱射之能否爲取舍但能射者非獨軍卒及閒良而已公私賤及閹雜人中亦多有之若所在守令不用私情精擇置簿俾免雜役則可備倉卒之用矣臣之所陳非專爲唐船而發也竊聞朝廷近與對馬島倭永絕和好彼倭不無怨望故爲此慮焉欽時年八十六陳此良策而不能採用人惜之○九月大憲鄭順朋奏於經筵曰大小尹之說其漸已久人或往見尹任則指謂大尹之黨見尹元衡者指謂小尹之

黨互相疑阻不爲往來至有欲移家者尹判林百齡家居故云大尹之黨扶護東宮小尹之黨有心於大君上有主上而私護東宮者邪譎無狀若有心於大君則悖逆不可道此必奸人謀亂朝廷爾凡造是說者以東宮無繼嗣故也東宮早晚有嗣則宗社臣民之福不幸無嗣東宮亦當爲宗社萬世之計况大君只有一人兄弟之間少無疑阻豈有他意上曰尹任尹元衡名雖至親其朋伴所爲予何能知果爲驚愕攻破乃可小人聚黨則爲患甚矣於是召洪彥弼尹仁鏡右贊成成世昌左參贊權櫟右參贊許磁兵判丁玉亨工判柳仁淑刑判尙震禮判任權吏判申光漢戶判林百齡大憲鄭順朋大諫林億齡詣賓廳下議曰予常時接世子與大君其禮有差頓無偏意世子大君相與友愛闕內上下無一毫疑阻之端不意在下有此邪議使上下不能安兄弟之間亦不能和極爲可駭此事其源有跡許垞推案供招有云許沆謂垞曰尹元老等欲陷害士林構成虛言元老歸尹任家謂曰當時士林疑我兄弟者以東宮無繼嗣中宮有大君故也古有宋仁宗廢后之事今之士林所謀難測吾兄弟以王宮至親不可緩圖又權輓書云元老等以黃憲尹安仁爲窟穴日夜聚議又曰元老見

任謂曰中殿薄待東宮之言發於士林吾等不可不明辨當時予已知此事恐終未安靜然奸兇已治無金安老許沈人心自然鎮定故予不以爲他慮也丁酉年欲害國母者以東宮無繼嗣中宮有大君而發疑似之言恐動奸兇其時至於儒生亦欲治罪予不聽焉其後此言不殄今之爲士林者不知其端喧說如此此非士林之自構也亦不可疑於誰發此言也此言已出於丁酉尹任尹元衡皆是至親予亦豈無所恤然大事不可不早防尹任首發邪議至今不止當竄外尹元衡不能使鎮定當罷之於是政府六曹三司屢奏言當靜以鎮之使流言自消不必罪任元衡爭之不已上從之史臣曰元老嘗與申秀涇言尹任與金安老欲廢王后造爲不根之說以嚇之而欲因以累及東宮所云許垞推案者正爲此也上之此舉若果至公無私則任與元衡同其罪可也而一罷一竄輕重懸殊其偏係之失亦可見矣此皆元老之所弄奸臺諫非不知也恐禍及己無一人出而言者可見當時氣節之偷靡也又曰上之初援丁酉事言之者欲加尹任以謀廢母后之罪也朝廷知上意而力防之故上亦屈辭以對而元老之謀自窮矣上誠欲定人心而爲此舉則莫若先正上心上心不

定故元老之讒得以間之而其弊將至於父子相疑其何能定人之心乎一世子以書示于侍講院曰兄弟友愛之情根於天理自不容已苟非大無道之人不以一己之私害天性之恩今我兄弟名分已定截不可亂况聖上待我兄弟無纖毫厚薄以何故而有相疑忌之端乎兩間至厚宜無人言而近來邪議紛紜無根之言肯動疑貳之端漸成前年竊聞經筵之上有此言心寒骨竦常懷不安豈料其言至今未殄乎此雖由吾不德之甚亦必有大姦人藏蹤秘跡肆其陰毒賊我兄弟而欲售其術此吾之所以痛入骨髓者也然姦人離間於兩間之狀兩殿洞照邦家之危安一身之禍福固不足患但以吾德之不進以致人言爲憂不知將如何而可也故陳吾中情上言于聖上下議于諸賢賓客○冬十月時世子讀綱目畢上教曰世子學問高明通鑑綱目一百五十餘卷今已畢讀是予十年所講者也儲副賢良朝廷共知予欲傳位退閒養病若使世子早習國事則豈不美哉仍賜書筵官宴于明政殿庭珍膳交錯歌鼓喧轟時人稱爲太平盛事○雷震侍講院書樓西柱○十一月上昇遐壽五十七上不豫王妃召妖尼祈禱又使女醫治之至大漸內醫提調請令朴世居洪沉入診

猶以禁忌日上生戊申故待于差備門外及入診已危重矣洪彥弼等夜請進見上戴翼善冠加朝服擁衾而坐世子伏於側上命引燭把筆臨小紙欲書不能成字仍縷縷言及禪位世子之意左右莫不掩泣明日昇遐○王世子卽位尊王妃曰王大妃立嬪朴氏爲王妃命國家機務一委大臣非喪事毋得奏稟江原都事金就文上疏言聖上在諒闇之初不宜受百官賀表荅曰罔極之中不能致省遂有此失予甚赧然○十二月大妃以慶原大君瘡疹令停朔望及別奠又使勿舉哀臺諫奏慈旨固不可不從而事妨大體則或有所不從今者初喪當哀敬盡禮而以大君在外瘡疹之故廢奠止哭略無哀戚之容無異平時中外聞見孰不驚駭荅曰廢奠與代奠官入叅事上達慈殿未得蒙允予亦悶極哭臨事今得蒙允當依禮爲之○大妃大作佛事臺諫侍從交章爭之上以慈教不能自斷生員辛百齡等上疏曰聖上爲大行大王供佛飯僧於名山大寺以求冥福大行大王生而爲一國之君以先王爲父聖上爲子富貴極矣無可願之事歿而爲不遷之主宗廟享之子孫保之功德盛矣無可祓之灾古之聖帝明王報本追慕之意不如是之苟也凡數百言而未又訟已卯諸賢之

冤荅曰所論切當哀憫罔極不敢條荅當留意焉

132
213

朝鮮史卷之四

朝鮮史卷之四

Blank page with a faint rectangular border.

132
213

